



## 會吵無？

阿華把電視拍開，越頭問我：「會傷大聲無？」繼落去隨閣問講：「按呢好毋？」

實在袂曉應伊，就清彩回講：「會使矣！」話才煞，我家己目頭結倚來，頭殼內即時攏總空去，十枝指頭仔架(khuè)佇字盤頂，毋知欲按佗位閣擲起。

姑不將就共電腦徙入來後尾空地比增建的灶竈間，厝頂蓋玻璃纖維的浪板，予落袂煞的西北雨，沃甲袂輪鼎底炒塗豆按呢嘎嘎叫，若閣恰尻川後牽長聲哼哼叫的電風摻落去，應該比外口客廳的電視閣較吵，嘛加大聲濟矣。這，攏無礙著我雙手拍電腦、想代誌，顛倒心肝頭清幽、快活到無地比！平平四箍輾轉攏有聲音咧靈，懸低大細嘛無啥精差，是按怎有遐大的無仝咧？

我家己咧臆，仝款的聲音咧響，若有定著的節奏咧懸懸低低心肝袂煩，因端是出佇人的耳空鬼仔，會曉共這欸聲音拚對邊仔去，予伊有閣敢若無，袂攏擾著頭殼內的心神，就親像倚踎溪仔邊，毋管佬雄的掣流聲，咱會恬恬用目睺那繩(tsîn)那欣賞爾爾，決定無人會講擋袂牢，起彼種想欲緊旋的心念。

另外，若講著聽歌、聽音樂，會予人即時快活心花總開，連我嘛會出聲喝讚。啊毋過，仝這個時陣，順繼兼做一寡恰心神思考有牽連的，譬論講寫文章、做詩句的工課，就無通遐好食咽矣，若無共遮的音樂總切予化(hua)去，隨變無路來。敢講是我狡怪閣歹鬥陣才會恰人遐無仝？我嘛毋知。抑是講所有咧做有關文字的工作者，攏有帶(tài)這欸「恬靜才做有工課」的症頭咧？若甲是按呢，毋是孤孤我爾，就無啥物通驚惶著狂；閣反倒轉來講，就準講干焦我一个，嘛是「喙鬚在人留」的古怪癖爾爾，恰是非、道德攏無牽磕著。

作者：藍春瑞

### ☆詞彙學習☆

【後尾】āu-bué：後面

【空地比】khang-tē-pí：依建蔽率所餘之法  
定空地

【靈】tân：響

【因端】in-tuann：原因

【耳空鬼仔】hīnn-khang-kuí-á：耳朵

【掣流】tshuah-lâu：急流

【繩】tsîn：注視

【緊旋】kín-suan：趕快溜之大吉

【帶（+病症）】tài：罹患

【若甲】nā-kah：既然是這樣

【孤孤】koo-koo：單單

### ☆文法學習☆

【那……那……(ná……ná……)】：兩個動詞同時進行，或同時做兩件以上的事情，可以用「那(ná)」來連接，表示「一邊……一邊……」，例如本文的「那繩那欣賞」表示「一邊注視一邊欣賞」，又如「那行那食」、「那看小說那聽音樂」等。同樣的句式也可以用來表示「愈……愈……」，第二個「那」後接形容詞，表示程度逐漸加。